

Kadasi ciciri su bo **PETORO** akerε i ni

¹ Mini Petoro bo m ti Yesu Kristo jaramasa ni, sukere ahin kadasi n na m fa ma ambere Nyeme minem bo wo yi am na am ti wofom na am asandi abara aye, na am wo Pontusi, ni Galatiya, ni Kapadosiya, ni Esiya, ni Bitiniya aworem n nu ni.

² Nyeme koroyanu dee ti, ye wo du mo ayi am ye i Awiewie Casi n ama am ayo i dee minem a, adena am de Yesu Kristo noanie ni, na i mbunja n nmisi am na i yo am casi. Nyeme buka am na i ma am ahoreda ko sin su.

Deke bo ya la i tama ni

³ Am ma ya kansu Nyeme, yiri bo i ti ya Mibie Yesu Kristo Si. Wo si ya anunfo agaya n dee ti, ye wo ma ya yo mine fofore, ye ya la tama wo ni ngoo a, dama i tengeeri Yesu Kristo i yiwee n nu wo.

⁴ Na am nya aceerim bo Nyeme afa ase angoro anminda ka i fa ma am ni. I ti aceeri bo i saaki ma, i yo ma fin, na i kaaki wie ma.

⁵ Am ayo Kristo yarada n dee ti, Nyeme la yiko bo i sasa am haari ni bo am ba nya tiide n bo wo sese i su ka am ba nya i awieeri su sanja ni.

⁶ Nyini kere dee ti, ye am la ahorejo n a, haari nzen wo yo daka ka am ahore saaki kaan fa ko kekereke barasu barasu n bo kisa am sunu i ni.

⁷ Nzen am koro mindi deeri nyini kekereke barasu n kere, nyini kere ka am ayo Kristo yarada nahore su a. Kabo am ayo Kristo yarada ni, i la anyunuyi tara sika bo i ka ngbeen ni. Sika yiri, bu fa i wura sin nu wo, na bu nie kabo i ti barasu, so ye Nyeme ma am di nyini waharam n a, na i nie kabo am ayo Kristo yarada n barasu ni. Nzen am ayo i yarada ni nahore su, ceen n bo Yesu Kristo ba yi i nu fite fofoe nu ni, am nya kansu, na bu wura am kpri, na bu ma am jirima.

⁸ Am nyumbaa nya nu ma yiri Yesu ni, ama, am koro i, haari ni bo am nyumbaa koro nu ma i kisa ni, am yo i yarada a, na am ahore ajo ako asin su, na am si ma kabo am se barasu,

⁹ dama am anya am yarada n kper, yiri la tiide n bo am anya i ni.

¹⁰ Nyini tiide n jore ye dawa de Nyeme noanie kanfo fiitiri i nu na bu si i n a, ye bu kan kereeri minem fa ko sakpa n bo Nyeme ba yo ma am n su n a.

¹¹ Na Kristo Awiewie n bo i wo bu do n adu mo akere bu kabo Kristo, Tiidefo n bo Nyeme ase ka i sunma i n ba diiri wahara ni, ni kabo i woowa ti kpri barasu ni, i wahara di n sin. Na ba boro bu nyi na bu si kabo yiri Kristo Tiidefo n ti barasu, ni sangga n bo nyini sam ni ba yo ni.

¹² Na Nyeme ama bu asi nu ka jore n bo ba kan i ni, i ti ma ka i buka bere ni bu tii wo, ama, i ti deke bo i buka amber wo. Yiri ye kisa am ati i afite minem bo bu kan labari kpa n kereeri am do n a. Nyeme maari i Awiewie Casi n fiteeri angoro ba maari bu yiko ye bu kaanri i jore n kereeri mine a. Nyini jorem ye Nyeme merkem

mmɔɔ koro ka bu nie nu na bu si i bu n a.

Kabo i ti ye ni ka ya woowa ti casi barasu ni

¹³ Nyini dɛɛ ti, am sɛsɛ am sunsunni su, na am tara am ɲu, na am fa am tama kɛrɛ wura sakpa n bo Nyɛmɛ bá yo ma am n nu, sanɣa bo Yesu Kristo bá yi i ɲu fite fofoe nu ni.

¹⁴ Am de Nyɛmɛ nɔaniɛ n ka nbaatumam bo bu de bu si nɔaniɛ ni, má am yo am kunnu koroowa, na am suyo satiem n bo am yo bu sanɣa bo am yo si má Nyɛmɛ atin ni.

¹⁵ Ama, am ma am woowa kɛrɛ ti casi, kabo yiri Nyɛmɛ woowa ti casi ni, yiri bo wɔ yi am ka i dɛɛm ni,

¹⁶ dama ba kɛrɛ i Nyɛmɛ Jɔrɛ Kadasi n nu ka, “Mini, m ti casi wɔ, nyini ti, wɔ yo daka ka ambɛrɛ gusu ti casi.”

¹⁷ Kabo am sere Nyɛmɛ, na am fere i ka am Si ni, am tara am ɲu na am bu i fa kɔ deke kɛrɛ bo am yo i am ɲɔɔ su ni, ahin durunya n bo i ti má am woobiri n nu ni, dama kabo i di minɛm jɔrɛ fa kɔ bu kɛrɛ sayoowa su ni, i tambu má nu.

¹⁸ Am si kabo Nyɛmɛ ade am tii aji afite am sayoowa ɲɔbɛɛnɲɔbɛɛnm n bo am nam yo fa maari am n nu ni. Deke n bo wɔ fa ade am tii aji n ti má ka sika wara jetɛ bo bu koro ka ɲɔbɛɛn ni,

¹⁹ ama, wɔ fa Yesu Kristo dɛɛ mbunja n bo i la má aɲusu na i ti ka bɔmbaa bo i la laifɛ na i la má fin be n dɛɛ n wɔ.

²⁰ Nyɛmɛ du mɔ yiiri i ka i ba yo sɔ ka, ye i nya ba yiiri durunya n a. Ama, ahin awieeri su sanɣa n bo ya wo nu n ye Nyɛmɛ ma wɔ fite fofoe nu, ambɛrɛ dɛɛ ti a.

²¹ Yiri dɛɛ ti ye am ayo Nyɛmɛ yarada n a. Nyɛmɛ tengeeri i yiwee n nu, na wɔ wura i kpiri, nyini dɛɛ ti ye am yo yarada na am la tama fa kɔ Nyɛmɛ dɔ n a.

²² Kabo am ade Nyɛmɛ nɔaniɛ n bo i ti nahɔrɛ, na wɔ yo am casi ni, nyini ma am koro am benɔgu bo dadaka wo má nu a. Nyini ti, am sukoro am benɔgu ni am ahorembaa fofoe ni nahɔrɛ su.

²³ Am akaaki mine fɔfɔrɛm, i ti má kabo adamande wu baa na i wu ni, ama, bo i wuuri am ni, i wu má. Nyɛmɛ faari i nɔaniɛ n bo i la ŋɔɔ na i la má awieeri n ye i ma am akaaki mine fɔfɔrɛm n a.

²⁴ Dama ba kerɛ i Nyɛmɛ Jɔrɛ Kadasi n nu ka, “Adamande kerɛ ti ka wura a,
i cɛ má na i wu.
Na bu nyumi kerɛ ti kabo wura pum yo nyumi barasu n wɔ,
i cɛ má na i yɔrɔki na i kɔnkpɔn.

²⁵ Ama, Micera n dɛɛ nɔaniɛ n wo bere wɔ sanɔa kerɛ.”
Nyini nɔaniɛ n ti labari kpa n bo ba kan akere am n a.

2

Nyɛmɛ mine n bo wɔ yi bu n jɔrɛ

¹ Nyini dɛɛ ti, am yaki sa kerɛ bo i ti má kpa, má am kɔ am benɔgum, má am sisi am benɔgum, má am yo am benɔgum burukɔɔnu sa, má am si am benɔgum kɔrɛ, má am kan am benɔgum jɔrɛ saaki bu.

² Kabo baakan koro nyufini ni, am gusu, am koro Nyɛmɛ nɔaniɛ n bo i ti ka nɔnɔ casi ni, nyini buka am ye am koro nyi na am nya tiide a,

³ dama ambere ni am tii si kabo Micera n ti kpa barasu.

⁴ Am bra Kristo do, yiri ti ka yabue n bo i la ngoo n a. Yiri ye fatafom ayi i atu n a. Ama, Nyeme ayi i ka i la anyunuyi.

⁵ Ambere gusu, am ti ka yabuem n bo bu la ngoo n wo, na Nyeme sufa am ta awuru n bo i Awiewie Casi n wo nu, na am yo i sayoowa donguyofo casim, na Awiewie Casi buka am na am yo yoowa bo i sun Nyeme nu, Yesu Kristo dee ti.

⁶ Dama ba kere i Nyeme Jore Kadasi n nu ka, Nyeme na,

“Am ti fen, m sufa yabue bo i la anyunuyi
sufa bo Siyon mie kpiri n bu,
sono kere bo i yoori i yarada,
i mi di ma nyinse.”

⁷ To, ambere bo am ayo i yarada ni, am anya deke bo i la anyunuyi ni, ama, minem bo bu yo ma i yarada ni, ba kere i Nyeme Jore Kadasi n nu ka,
“Yabue n bo bondo tafom n faari i tuuri ni,
yiri ye wo kaaki bondo n jaa yabuem n kere
tii a.”

⁸ Na ba kaaki akere i Nyeme Jore Kadasi n nu ka,
“Nyini yabue ni, minem bo bu jaa su,
na bu kpaasi.”

Deke n bo i ti na bu kpaasi n la ka, ba de ma Nyeme noanie ni, kabo wo yo daka ka i yo lee.

⁹ Ama, ambere, am ti daanfie n bo Nyeme ayi am wo, am ti sayoowa donguyofom bo am su Nyeme bo i ti am feme n wo, am ti Nyeme dee mine casim wo, am ti Nyeme dee awuru-nbaam wo. Yiri ye wo yi am ka am kan i sakpam

kere minem a, dama wɔ yi am afite awosin nu, afa am awura i dɛɛ wein n bo i la má aɲusu n nu.

¹⁰ Ba kere i Nyeme Jɔre Kadasi n nu ka,
 “Saɲga be, am yo ti má i dɛɛ minem,
 ama, kisa, am ti Nyeme dɛɛm wɔ.
 Nyini saɲga, Nyeme yo si má am aɲunfɔ,
 ama, kisa, wɔ si am aɲunfɔ.”

Kabo Nyeme akɔɔm woowa ti barasu ni

¹¹ M danfo kparam, am ti wɔfɔm wɔ, ni minem bo bu la má woobiri durunya n nu fɛn, nyini dɛɛ ti, m sere am ni anyumboro wɔ, má am ma am nyunu boro am aɲuniembaa koroowa su, dama am aɲuniembaa koroowam sukoro ka bu kunma am wɔ.

¹² Am ma am woowa ti kpa, na nzen minem bo bu su má Nyeme n jaraki am fa kɔ satie be su, bu ba ɲu am sakpa n bo am yo i ni, na bu kánsi Nyeme, cɛɛn n bo i bá nie i minem su ni.

¹³ Ya Mibie n dɛɛ ti, am de nfaɲgafɔm kere nɔanie, fɛme bo i nie adamande kere su ni,

¹⁴ ni nkpienkpienm bo wɔ yi bu ka bu sunie am su ni, am de bu nɔanie, dama ba fa bu ase ka bu cin minem bo bu yo satie n sui wɔ, na bu kansu minem bo bu yo sakpa ni.

¹⁵ Nyeme koro ka am yo sakpa a, na minem bo bu ti sinnzinm na bu si má be ni, na bu si má kabo bu kan.

¹⁶ Am ti minem bo am ade am tii wɔ, má am nie ka am anya am tii n dɛɛ ti, na am sufie yo satie. Ama, am ma am woowa ti kabo Nyeme akɔɔm woowa ti barasu ni.

17 Am bu sɔnɔ kere sɔnɔ, am koro am ninbaam kere, am soro Nyeme, na am bu Romafom feme kpiri ni.

Kabo ya sɔn Kristo wahara diiwa n su ni

18 Ambere bo am ti akɔm ni, am de am mibiem nɔanie, na am bu bu nahɔre su, má ka bo bu ti benle na bu yo am sakpa ni ngumi, ama, haari bo bu ti tie ni mmɔɔ, am bu bu.

19 Nzen am ayo má satie be, na bu kere am wahara na am mindi deeri i, ka am soro Nyeme n dɛɛ ti, nyini ti kpa a.

20 Nzu kperɛ ye am nyá i a, nzen am yoori satie na bu boori am na am mindi deeri i? Ama, nzen am yoori sakpa, na bu kere am wahara, na am mindi deeri i, nyini ti kpa Nyeme dɔ a.

21 Nyini dɛɛ ti, ye Nyeme afere am a, dama Kristo ni i tii adi wahara ama am, nyini kere am ka i ti ye ni ka am sɔn i su di i wahara n be.

22 Bu ɲa, yiri,
“Wɔ yo má satie be,
wɔ kaaki abu má kɔre be.”

23 Bu kpiɛeri i nzuko ni, wɔ wɔrɔ má nzuko ama má bu. Bu kereeri i wahara ni, wɔ se má bu ka bu ɲú i. Ama, yiri faari i deke kere maari Nyeme wɔ, yiri bo i di jɔre bo i kɔ atin su ni.

24 Ya satie dɛɛ ti, ye Kristo deeri ya jinaabiri diiri wahara wuuri baka jaanu n su a. I yoori sɔ, adena i kere ka ya wu wɔ, fa kɔ ya satie su, na ya la ngɔɔ bo ya koro yo sakpa. Wahara n bo Kristo diiri i ɲunie nu n dɛɛ ti, ye am anya laifie a.

25 Am yo ti ka nbɔem bo ba mini wɔ, ama, kisa, am akaaki aba yiri bo i ti am sasafɔ na i nie am dika n dɔ.

3

Kabo i ti ye ni ka nbaram ni bu hunm wo barasu ni

¹ Tɔ, amberɛ nbaram gusu, am de am hunm nɔaniɛ. Na nzen bu nbem nya yo má Nyemɛ nɔaniɛ n yarada, na am woowa ti kpa, nyini ma bu yo yarada, má ka am nɔaniɛ jɔjɔwa n dɛɛ ti,

² ama, nzen bu ɲuuri ka am woowa ti casi, na am ma bu jirima, nyini ma bu kaaki bu wo na bu su Nyemɛ a.

³ Deke bo i kere ka am yo nyumi ni, i ti má kabo am yo am ɲu di am tiɲmɛ sunɲuruya ni, ni kabo am wura sikam, ni kabo am kara sutura kpakpam n barasu ni,

⁴ ama, deke bo i kere ka am yo nyumi n la wo kpa bo i fite am ahorembaa su, na i saari má ni. I ti ye ni ka am yo am ɲu kaan, na am wo benlɛ, nyini ti deke bo i la anyunuyi nahɔrɛ su Nyemɛ dɔ a.

⁵ Dama kabo dawa sɔŋga, nbaram nbem bo bu ti casi na bu la tama ni Nyemɛ n yo yoori bu ɲu nyumi lɛɛ, bu deeri bu hunm nɔaniɛ wɔ,

⁶ kabo Saara gusu yo yoori lɛɛ, i deeri i hun Abraham nɔaniɛ wɔ, na wɔ fere i ka “M awuru-fɔbiɛ.” Nzen am yoori sa bo i ti kpa na am soro má sɛrɛ, am akaaki Saara nbaam wɔ lɛɛ.

⁷ Amberɛ nbiesɔm, i ti ye ni ka am gusu yo sɔ. Am si kabo am fa ɲɔnlɛ bita am yim barasu. Am si ka nbaram faɲga ni am dɛɛ sɛ má, nyini ti, am bu am yim. Dama am ni berɛ kerɛ sɔŋga nya Nyemɛ aceeri n a, yiri la ɲɔɔ bo i la má awieeri ni. Am bita bu nyunyumi, adena má deke be kanda am nyemesere.

Kabo yaradayofɔm diiri wahara fa kɔ sakpa dɛɛ ti

⁸ Tɔ, deke bo m koro ka m fa kun jɔrɛ n kɛrɛ nɔɔ n la ka, am kɛrɛ fa anɔɔsɛ, na am cɛcɛ wo am beɲgu nu, na am koro am beɲgu ka am ti nibaam wɔ, na am si am beɲgu aɲunfɔ, na am yo am ɲu kaan ma am beɲgu.

⁹ Nzen be yo am satie, má am yo tie tɔ i kaari, na nzen be kpɛɛri am nzukɔ, má am wɔrɔ nzukɔ ma i, ama, kabo am yo la ka, am yo bu kisi, dama deke n bo i ti na Nyemɛ afere am la ka, i yó am kisi wɔ.

¹⁰ Dama ba kɛrɛ i Nyemɛ Jɔrɛ Kadasi n nu ka, “Sɔnɔ kɛrɛ bo i koro ka i ɲu i ɲu fie,

na i wo wo bo i yo fie,

i mi tara i taferema na má i sujɔɔ jɔrɛ tie,

na má i sudadaka minem.

¹¹ I mi yaki satieyo,

na i yo sa bo i ti kpa,

i mi boro i nyi

na i sukpini tanalaifie busu.

¹² Dama Nyemɛ nyumbaa ta minem bo bu yo sa bo i kɔ atin su ni,

na i so i sui ti bu nyemɛsere,

ama, i koro má ka i nyumbaa ɲu bo bu yo satie ni.”

¹³ Nzen am nyunu aboro ka am yo sa bo i ti kpa, ɲma koro yo am pui a?

¹⁴ Ama, nzen am yo sa bo i kɔ atin su n dɛɛ ti, ye am sudi wahara, am terefie læɛ, má am soro bu, má am ma am ahore saaki.

¹⁵ Ama, am ma Kristo yo am Mibie n na am bu i am ahore su. Na am kpa am ɲu ɲminda sanɲa

kere, na nzen be ba bisa am fa ko deke n bo i ti na am la tama ni, na am si kabo am bo i nu barasu,

¹⁶ ama, am jɔjɔ benle, na am bu i mi, na am si am sunsunni nu ka am ayo sakpa, adena nzen minem jɔjɔri am ηgbεεηηgbεε fa ko am wo kpa n su ka am su Kristo dεε ti, na bu dí nyinse.

¹⁷ Dama nzen am yo sakpa na am di wahara na i ti Nyeme koroyanu, i ti ye ni bo am yo satie na bu kere am wahara.

¹⁸ Ya satie dεε ti ye Kristo gusu diiri wahara kpekun n kpein a, na yiri bo i yo sa bo i ko atin su n awu, yere bo ya ti satieyofom dεε ti, na i yo ya ni Nyeme afien dongu. Bu kuunri i ni, na Nyeme ama i ηgɔɔ awiewie n nu,

¹⁹ na wo nya ako akan jɔre akere awiewiem bo bu wo dansaraka n nu ni.

²⁰ Dawa sanɔa, bere yo keteeri Nyeme noanie n a, na Nyeme ayo sawore anminda, sanɔa bo Nowa sukpa lee bambaka n ni. Nyini lee ni, mine kaan so wurari nu n a, bu mocue nyaari tiide, ye nzue n adi má bu a.

²¹ Nyini nzue n ti deke bo i kere fa ko Nyeme nzue bieewa bo i ma am anya tiide nyuma n wo. Nyeme nzue bie ti má deke bo i yi am ηunie su fin, ama, i kere ka am si am sunsunni nu ka, am la má ηgasi be Nyeme do, dama Yesu Kristo tengeeri i yiwee n nu n dεε ti.

²² Yiri ye wo ko angoro ako atana Nyeme saa fomboro su n a, ye i la yiko nie merékem kere su a, ni yikofom, ni nfangafom barasu kere.

Kabo i ti ye ni ka yaradayofom wo ni

¹ Tɔ, kabo Kristo diiri wahara i ηunιε n nu ni, i ti ye ni ka am gusu kpa am ηu bita nyini sunsunni ni, dama sɔnɔ kere bo i diiri wahara i ηuniembaa nu yo má satie kun.

² Nyini dɛɛ ti, má am yo am kunnu koroowa, ama, am yo kabo Nyeme koro ni, haari am ηɔɔ awieeri.

³ Saɲga be am yo yoori am kunnu koroowa, deke bo minem bo bu si má Nyeme n yo i ni, wɔ sɛ su sɔ. Am yo tara má am ηu, na am yo su konvikiya ηgbɛɛnηgbɛɛnm, na am nu nzan bo, na am nu nzan yo sa ηgbɛɛnηgbɛɛn kabo nzan nufom yo ni, na am susu amɔɛm, deke bo Nyeme koro má i ni.

⁴ Kisa na am ni bere saɲga wo má nyini wo ηgbɛɛn ni, jɔre n amie bu wɔ, nyini dɛɛ ti ye bu kpie am nzuko n a.

⁵ Ama, bere ni bu tii, bu bá jina Nyeme nyunu, na bu kán deke kere bo ba yo i. Yiri ye wɔ yo siriya ka i dí minem bo bu la ηɔɔ ni bo ba wu n jɔre a.

⁶ Nyini dɛɛ ti, ye bo ba wu n gusu tiiri labari kpa n jɔre kaanwa n a, adena haari ni bo bu wuuri kabo adamande kere wu ni, bu nyá ηɔɔ awiewie n nu kabo Nyeme la ηɔɔ ni.

Nyeme amusuisufom kpaɲ jɔre

⁷ Deke n kere sukɔ awieeri lɛɛ. Nyini dɛɛ ti, má am fa am ηu ji, am tara am ηu na am koro sere Nyeme.

⁸ Sa n bo i tara deke n kere n la ka, am koro am beɲgu ni nahɔre su, dama koro kata satie dɔɲgu su wɔ.

⁹ Nzen am beṅgum aseke am wɔfɔ, am de bu, má am ṅuṅuti.

¹⁰ Nyeme ama am kere aceeri barasu barasu, nyini ti, i ti ye ni ka am fa nyini aceerim buka am beṅgu. Sɔnɔ kere suyo i juma nyunyumi kabo Nyeme afa ama am ni.

¹¹ Wɔrɔ kere bo Nyeme ama u aceeri ka a kan i jɔre, si ka Nyeme jɔre ye a sukan i a, wɔrɔ kere bo Nyeme ama u aceeri ka a fa buka minem, buka bu ni faṅga n bo Nyeme afa ama u ni, adena am sayoowa kere nu na Nyeme nya kansì, Yesu Kristo deɛ ti. Yiri la yiko ni jirima sanḡa kere sanḡa. Ami.

Kabo i ti ye ni ka Kristo susufɔm di wahara barasu ni

¹² M danfo kpam, má am ma wahara kekereke n bo am sudi i n yo am fura nu, dama Nyeme suyo am na i niɛ a. Má am sunsun ka i ti sa bo wɔ nya tu má be wɔ.

¹³ Ama, kabo am sudi Kristo deɛ wahara n bo i diiri i n be ni, am ma am ahore jɔ, adena cɛɛn n bo Kristo jirima woowa bo i la má aṅusu n bá fite fofoe nu, am ahore jɔ na i yó am fiɛ.

¹⁴ Nzen bu kpiɛeri am nzukɔ, ka am ti Kristo deɛm ti, nyini la ka am terefiɛ lɛɛ, dama Nyeme Awiewie Casi n wo am dɔ lɛɛ, yiri bo i la jirima woowa n na i la má aṅusu ni.

¹⁵ Ama, nzen am be diiri wahara, má i yo ka i mi akun sɔnɔ, wara wɔ wɔ, wara wɔ yo sa ṅbɛɛnṅbɛɛn be, wara wɔ wura minem jɔre nu, nyini n sɔ ti má kpa.

16 Ama, nzen sɔnɔ sudi wahara ka i ti Kristo susufo n dɛɛ ti, má i mi ma nyinse ti i, ama, i mi kansɩ Nyɛmɛ, ka i ti Kristo dɛɛ ti.

17 Dama sanɔa n aju bo Nyɛmɛ dí minɛm jɔrɛ. I dú mɔ bo i bu di i tienɔgu minɛm jɔrɛ wɔ ka. Ye nzen i nya du mɔ diiri yeɛ jɔrɛ, minɛm n bo ba ka na ba de má i labari kpa ni, bu wíe se wɔ lɛɛ?

18 Dama ba kɛrɛ i Nyɛmɛ Jɔrɛ Kadasi n nu ka, “Nzen i ti kekere ka minɛm bo bu ti kpam nya tiide,
ye satieyofɔm, ni bo bu bu má Nyɛmɛ ni,
i yó bu se wɔ?”

19 Nyini ti, minɛm bo bu sudi wahara Nyɛmɛ koroyanu n dɛɛ ti ni, i ti ye ni ka bu boro bu nyi na bu suyo sakpa, na bu fa bu ηu wura Nyɛmɛ saa nu, dama yiri bo wɔ yi bu ni, i yáki má bu cɛɛn n be da.

5

Kristo jama n woowa jɔrɛ

1 Ambɛrɛ bo am wo Kristo jama n nu, na am ti nkpiɛnm ni, mini mmɔɔ ti Kristo jama n kpiɛn kun wɔ, ma ηu kabo Kristo diiri wahara barasu ni, na m bá nya i dɛɛ jirima woowa n be, sanɔa bo i bá fite fofoe nu. Nyini ti, m susere am jande wɔ,

2 am niɛ Nyɛmɛ minɛm bo bu wo am dɔ n su, kabo bɔɛsasafɔ niɛ i nbɔɛm su barasu ni. Am niɛ bu dika nyunyumi, má ka bu miɛ am wɔ, ama, am koroyanu, dama Nyɛmɛ koro ka am yo i a, má am yo i ka ηwaa kpini dɛɛ ti, ama, am yo i ka am nyunu aboro ka am yo i wɔ.

³ Bere n bo Nyeme afa bu ama am ka am nie bu su ni, má am mie bu ka am ti bu mibiem wo. Ama, am ma am sayoowa ko atin su, na bu nu i na bu son am su.

⁴ Nzen am yoori so, ceen bo boesasafɔ kpien n bá fiteeri fofoe nu, am nyá aceeri bo i la má anusu na i wie má fieo ni.

⁵ Ambere gusu bo am nyunu nya ti má ni, am bu nkpienm ni, na am de bu nɔanie. Am kere yo am nu kaan na am buka am beɲgu, dama ba kere i Nyeme Jore Kadasi n nu ka, “Nyeme kete kpirikorofom wo, ama, na i fa i ahɔroma n ma tarakam.”

⁶ Nyini ti, am da am nu asienɲu fa ma Nyeme yikofɔ ni, na sanɲa n ba juuri, yiri wúra am kpiri a.

⁷ Deke kere bo i mie am, am fa tu Nyeme nyunu, dama yiri cece wo am nu a.

⁸ Am tara am nu sanɲa kere, má am fa am nu ji. Dama am kpɔfo Sitana ni, i sansan am kabo jara sansan nuundi koro sonɔ na i kpese i n wo.

⁹ Am yo Nyeme yarada jina kenken na am kete Sitana, dama am si ka am ninbaam bo bu wo durunya n kere nu n gusu sudi wahara n bo am sudi i n be n wo.

¹⁰ Nzen am diiri wahara sanɲa kaan su, Nyeme sese am su yo am donɲu a, yiri má am jina kun su a, na i wúra am fanɲa, na i kpáma am. Buka kere fite yiri Nyeme do a, Kristo dee ti ye wo fere am ka am bá nya i dee jirima woowa n bo i la má awieeri n be a.

¹¹ Yiri la yiko sanɲa kere a. Ami.

Awieeri su dee nɔanie ni

¹² Ya niwa Silivanusi, m si i ka i la dabuṅu am dɔ, yiri bukaari m ye ma kere ahin kadasi kaan n sufa ma am n a, na am ahore si, na m ma am si ka jore n bo ma kere ama am ti Nyeme aceeri wo nahore su, na am jina kenken.

¹³ Kristo jamam bo Nyeme asanga ayi am ni bere kere, na bu wo Babilon mie kpiri n nu ni, ni m wa Marako kere bisa am dongu.

¹⁴ Am bisa am beṅgu dongu ni koro. Nyeme ma am bere kere bo am ti Kristo deem ni ahoreda.

ΝΥΣΜΕ ΙΟΡΕ ΚΑΔΑΣΙ
The New Testament in Anufo (Chokosi)

copyright © 2009 Wycliffe Bible Translators, Inc.

Language: Anufo

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source
files dated 1 May 2025

fe36d0e6-2a60-5e15-8d1c-8bf275389598